

院司書○乙巳京畿觀察使金璫啓曰前日命臣率道內有武才守令來初十月驅獵清溪山惡虎臣年老踈濶而守令可任者數人下番軍士僅二千餘名必不能成事以事知武臣定為將帥率道內可當守令措置何如傳曰遣將則與命將打圍無異惡獸非獨興行於清溪山各官皆有之令各官設陷穿捕之可也○御晝講○臺諫啓前事又啓曰趙邦彥只以言辭之失猶見罷職况前承旨等乎請皆罷職昨者堂下官三人俱陞為承旨爵命不可濫施而其中金克愷出身今纔四年曾無清顯之叙驟陞倍於他貪請改正諫院啓曰金揚震適承旨而即叙政曹殊無左遷之意請亟罷之傳曰克愷出身雖未久屢經臺諫及判事今為承旨有何不可揚震既適承旨雖授他官何害不須論執餘亦不允○夜赤氣布天○丙午 上御勤政殿出文科試題日出時幸慕華館取武科李晝忠等二十人○丁未臺諫啓前事 命以金揚震送西餘皆不允○賜生員姜崇德等七人文科出身○戊申傳曰即有議事速召三公領議政金詮左議政南袞右議政李惟清詣賓廳傳曰前者慈殿未寧累欲移御于昌德宮予念移御非輕亦慮予往來問安勢不能數恐虧定省之禮反覆啓之今 慈殿脾胃傷和不能進膳故困倦之